

Headlines

- सर्वोच्च अदालतै वक्ख कनून पर रोक लाने शा इंकार कीता ऐ पर एहदे किश प्रावधानें गी स्थगित करी दिता ऐ।
- कश्मीर थमां दिल्ली लेई पैहली पार्सल कारगो रेल सेवा शुरु। उपराज्यपाल मनोज सिन्हा होरें आक्खेया जे एहदे नै मकामी अर्थव्यवस्था गी बढ़ावा थहोग।
- केन्द्री मंत्री डाक्टर जितेन्द्र सिंह होरें घोषणा कीती ऐ जे डोडा जिले च खलैनी-गोहा सिड़कै पर खनक नाले पर पुलै दा निर्माण कम्म तौले शुरु होग।
- राई-बाई मंत्री जावेद अहमद डार होरें जम्मू श्रीनगर राष्ट्री जरनैली सिड़कै दी स्थिति दा जायजा लैने लेई जबलीपोरा ते कांजीगुंड दा दौरा लाया।
- रियासी जिला प्रशासन नै भारती फौज कन्नै रलियै भमाग इलाके दे प्रभावित साड़ी ग्रं च ब्हाई रस्तेया राशन पुजाया ऐ।

<><><><><><>

SC Waqf

सर्वोच्च अदालतै वक्फ कनून पर रोक लाने शा इंकार कीता ऐ पर वक्फ संशोधन कानून 2025 दे किश प्रावधानें गी स्थगित करी दिता ऐ। कुसै व्यक्ति गी अपनी संपत्ति वक्फ दे रूप च समर्पित करने शा पैहले 5 बरें तगर मुस्लिम धर्म दी पालमा करने दी जरूरत आहले नियम पर बी रोक लाई गेई ऐ। सर्वोच्च अदालतै हुक्म रसाल कीता ऐ जे एह नियम तदुं तगर स्थगित रक्खेआ जाहग जदूं तगर राज्य सरकारां ऐसी शर्तां तय करने लेई नियम नेई बनाई लैदिआं। अंतरिम हुक्मै दी घोषणा करदे होई प्रधान न्यांधीश न्यांमूर्ति बी.आर. गवई ते न्यांमूर्ति ऑगस्टिन जॉर्ज मसीह हुंदी पीठ ने सरकार आसेआ नामित अधिकारी गी एह फैसला लैने दी इजाजत देने आहले प्रावधान पर बी रोक लाई दिती गेई ऐ जे क्या वक्फ संपत्ति सरकारी जिमीं पर अतिक्रमण करदी ऐ। वक्फ बोर्ड लेई गैर-मुस्लिम सदस्यें दे नामांकन गी इजाजत देने आहले प्रावधान पर रोक नेई लाई गेई ऐ। अदालत ने इब्बी साफ कीता ऐ जे जित्थे तोहड़ी मुमकन होऐ, बोर्ड दा औहद्वे मूजब सदस्य मुसलमान होना चाहिद। अदालतै इब्बी आक्खेआ ऐ जे केंद्रीय वक्फ परिषद च चार शा मते गैर-मुस्लिम सदस्य नेई होडन ते राज्य वक्फ बोर्ड च त्रै शा मते गैर-मुस्लिम सदस्य शामिल नेई कीते जाडन।

<><><><><><>

LG- Cargo Train

लैफ्टिनेंट गवर्नर मनोज सिन्हा होरें अज्ज बडगाम थमां नमीं दिल्ली दे आदर्श नगर तोहड़ी पैहली कारगो-पार्सल ट्रेन गी झंडी दस्सियै रवाना कीता जेड़ी देसै दे टर्मिनल बजारें तगर फलें ते इस चाल्ली दे होरनें उत्पादे गी पुजाने दा इक सस्ता ते भरोसेमंद जरिया उपलब्ध कराग। इस कारगो पार्सल ट्रेन गी अज्ज नौगाम रेलवे स्टेशन थमां झंडी दस्सियै रवाना कीता गया ते एह कल मंगलवारें दिल्ली पुज्जी जाह्ग। एल.जी. होरें इस मौके पर आक्खेया जे ओहू इस कारगो सेवा गी शुरू करने लेई प्रधानमंत्री नरेन्द्र मोदी हुंदा धन्नवाद करदे ना। उनें गलाया जे हर रोज घाटी थमां 23 शा 24 टन सेअऊ ते होर दुए उत्पाद भेजे जागनं जेहड़े अगले रोज दिल्ली पुज्जा करगन।

<><><><><><>

Jitender Bridge

डोडा जिले च मरम्मत इलाके दे लोके लेई इक बड़ी विकास आली पैहल तहत खलैनी-गोहा सिडकै पर खनक नाले पर पुल दे निर्माण दी इक चिरकी मंग हून पूरी होने आली ऐ। केन्द्री मंत्री डाक्टर जितेन्द्र सिंह होरें ऐलान कीता ऐ जे राष्ट्री जरनैली सिडकें ते ढांचागत विकास सरबन्धी कारपोरेशन –NHIDCL नै इस सरबन्धै च प्रक्रिया रम्भी दिती ऐ ते इस गल्लै दा जकीन बी दोआया ऐ जे मौसम ठीक रौहने दी सूरतै च पुलै दा कम्म बड़ी तौले शुरू करी दिता जाह्ग। युवा नेता इखलाक वानी हुंदी अगुवाई च मकामी लोके दे इक डेलीगेशनै मंत्री हुंदे नै मिलियै एह मंग उंदे अगगे रक्खी ही-जेह्दे मगरा इस सरबन्धै च ऐलान कीता गया ऐ। डाक्टर सिंह होरें इब्बी गलाया ऐ जे विधायक शक्तिराज परिहार होरें बी एहू मसला उंदे अगगे रक्खदे होई इस पुलै दे महत्व ते जरूरत पर लौ पाई ही।

<><><><><><>

Seva Parv SBC

सेवा ते सुशासन दे मूलमंत्र पर आधारित केन्द्र सरकार तरक्की ते सकारात्मक बदलाव आनने लेई लगातार जतन करा रदी ऐ। मुख्य भरै च अज्जै थमां शुरू “सेवा पर्व” दे तैहत इस खास श्रृंखला च अज्ज अस गल्ल करगे जे किस चाली प्रधानमंत्री नरेन्द्र मोदी हुंदी अगुआई च सरकार नै “स्वच्छ भारत अभियान” दे राएं हर माहनू दे जीवन च सुधार कीता ऐ। 2014 च प्रधानमंत्री मोदी हुंदे

आसेया शुरु कीते गेदे इस अभियान नै पूरे भारत च स्वच्छता मुहीम दी शुरुआत कीती ही। विदेश दी रिपोर्ट मताबक एहदे तैहत 12 करोड़ शा मते शौचालयें दा निर्माण कीता गया ऐ ते देशै गी खुल्ले च शौच कोला मुक्त करियै हर बरे तकरीबन 70 हजार लोकें दी जान बचाई गेई ऐ। सरकार दे जतनें दा गै नतीजा ऐ जे 78 फीसद घरें गी हून नलकें राहें पीने आला पानी उपलब्ध करोआया जा रदा ऐ ते अगले बरे तगर शैहरें गी कूड़े थमां मुक्त बनाने लेई लगातार जतन जारी न।

<><><><><><>

Programme-Announcement

सेवा पर्व 2025 दे तैहत आयोजित बक्खबक्ख कार्यक्रमें ते गतिविधियें दे इक हिस्से दे तौरा पर - आकाशवाणी दा क्षेत्रीय समाचार एकांश जम्मू, औंदी 17 सितम्बर गी दपैहरी 12:30 बजे 30एं मिनटें दी इक वशेष परिचर्चा प्रसारत करने जा'रदा ऐ- जेहदा विषय सार ऐ -“आर्थिक सुधारें कन्नै विकास गी थोआरदी नमी गति”। इस कार्यक्रम च स्टाडे परौहने होगन -जम्मू युनिवर्सिटी च Economics Dept. दे HOD Prof. Dipanker Sengupta होरजेहडे इस विषय दे - -बक्ख पैहलुएं पर लौ पागन। उन्दे ल-बक्खजगमोशन शर्मा ते कुणाल श्रीवत्स। 30एं मिन्टे दा एह कार्यक्रम 17 सितंबर गी दपैहरी 12:30 बजे प्रसारत कीता जाहग, जिसी तुस स्टाडी FM फ्रिक्वेंसी 100 इशारिया 3 मैगाहर्ट्स ते कन्नै मीडियम वेव 303 मीटर यानि 990 Khz पर बी सुनी सकदे ओ।

<><><><><><>

Dar NH-44 Assess

मुख्यमंत्री उमर अब्दुल्ला हुंदे निर्देशें पर राई-बाई मंत्री जावेद अहमद डार होरें अज्ज जबलपुर ते कांजीगुंड दा दौरा लाया ते जम्मू-श्रीनगर राष्ट्रीय जरनैली सिड़कै पर मौजूदा हालात दा जायजा लैता। इस मौके पर उन्दे कन्नै शंगुस थमां विधायक Reyaz Khan ते MLA अब्दुल Majeed Larimi होर उत्थे मौजूद हे। मंत्री डार होरें जानकारी दिती जे मुख्यमंत्री होरें इस गल्लै दा भरोसा दोआया ऐ जे उन्दी सरकार नै सब्भनें अधिकारियें कन्नै लगातार राबता बनाई रक्खे दा ऐ ते कश्मीर घाटी थमां फलें गी बाहर भेजने आस्तै हर मुमकिन जतन कीते जा रदे न। भारी बरखें ते बार-बार पस्सियां पौने कारण जरनैली सिड़कै दे बंद होने करी ट्रक ड्राइवर, फलें

दे उत्पादकें ते आम जनता गी बड़ा मता नुक्सान झल्लना पवा रदा ऐ। दिन-रात जतन करने दे बावजूद बी लगातार पस्सियां पौने कारण मरम्मत आले कम्मै च अड़चना पवा रदियां न।

<><><><><><>

Reasi Relief

रियासी दियां डिप्टी कमीशनर निधि मलिक हुंदी दिक्ख-रिक्ख च जिला प्रशासन रियासी नै भारती फौज कन्नै रलियै भमाग इलाके दे साड़ी ग्रां च ब्हाई रस्तेया राशन पजाया। भमाग तहसील दा साड़ी इलाका टोट थमां औंदे होई रियासी साड़ी आली सिड़कै पर पस्सियां पौने करी प्रभावित होई गया ऐ, आओ-जाई लेई रस्ता बंद होई गया ऐ, जिसलै के मोगरी थमां हुंदे होई अतिरिक्त उधमपुर साड़ी सिड़क थाथी पुलै दे रुड़ी जाने करी पूरी चाली बंद होई गई ऐ। डिप्टी कमीशनर निधि मलिक होरें इस बारे बोलदे होई आक्खेया जे इस गैह दा मकसद हा जे लोकें तगर राशन, खाने-पीने आहली चीजां ते होर दुआ जरूरी समेयान पुजाया जा।

<><><><><><>

GST Reforms

अगली पीढ़ी दे GST सुधारें तैहत GST दियें दरे च कटौती दे हालिया फैसले पर जम्मू-कश्मीर दे लोकें बड़ा मता सुआगत करदे होई इनेंगी आम माहनुयै लेई बड़ी बड्डी राहत करार दिता ऐ। प्रधानमंत्री नरेन्द्र मोदी होरें आजादी आले ध्याड़े पर इस बारे ऐलान कीता हा ते GST काउंसल नै जंदी 3 सितम्बर गी एकड़े सुधारें गी मंजूरी देई दिती ही। GST काउंसल नै जुते-चप्पलें पर GST दी दर गी 12 फीसद शा घटाइयै 5 फीसद करी दिता ऐ। इस्सै चाल्ली लकड़ी, पत्थर ते धातु दियें मूर्तियें पर बी GST दी दर गी 12 फीसद शा घटाइयै 5 फीसद कीता गया ऐ। इस्सै चाली दी कटौती कच्च दियें मूर्तियें, लोहे, एल्मूनियम, पित्तल ते तांबे दियें कलाकृतियें पर बी कीती गई ऐ।

<><><><><><>

BOCW Ramban

रामबन जिले च श्रम विभाग आसेया बनिहाल दे टाउन हाल च इक जागरुकता शिविर दा आयोजन कीता गया तां जे कम्मगारें ते निर्माण कम्मे कन्नै जुड़े दे मजदूरें गी बक्ख-बक्ख श्रम कनूनें ते कल्याणकारी स्कीमें बारे जानकारी दिती जाई सकै। कैम्प दौरान अधिकारियें ईमारतें ते होर दुए निर्माण कम्मे कन्नै जुड़े दे मजदूरें गी BOCW Act दे फायदें बारे दस्सेया दसाया। एहदे च शामिल होने आले प्रतिभागियें गी समाजी सुरक्षा ते बीमे सरबन्धी स्कीमें बारे जानकारी बनाने पर जोर दिता गया, जिंदे च प्रधानमंत्री जीवन ज्योति बीमा योजना, प्रधानमंत्री सुरक्षा बीमा योजना ते अटल पेंशन योजना शामिल न।

<><><><><><>

Jashn-e-Dal Water Sports Festival

श्रीनगर दी “डल झील” पर पानी सरबन्धी खेडु महोत्सव “जश्न-ए-डल” दा आयोजन होआ करदा ऐ। त्रंऊ-रोजा इस महोत्सव च 700 कोला मते प्रतिभागी हिस्सा लै करदे न। एह प्रतिभागी 20एं कोला मती खेडुं जियां केनोईग-ड्रैगन बोट-केयार्किंग ते शिकारा दौड़ च हिस्सा लै करदे न। इस महोत्सव दा आयोजन जम्मू-कश्मीर पुलिस आसेया कीता गया ऐ। एदी शुरुआत 13 सितम्बर गी होई ही ते एहू अज्ज सम्पन्न होआ रदा ऐ। एदा मकसद घाटी च सैलसफा ते नौजवानें सरबन्धी गतिविधियें च बाढ़ा करना ऐ।

<><><><><><>